

Omenduak izan diren kideak eta Akademiak berak omenduak

Euskaltzaindiak Akademiaren domina eman dio Iñigo Urkullu lehendakariari

Lehenik, Akademiaren Zuzendaritzarekin batzartu da liburutegian. Bertan, Euskaltzaindiaren lan-ildoak eta helburu nagusiak laburrean azaldu dizkiote Zuzendaritzako kideek. Azalpenaren ostean, hainbat liburu eta agiri erakutsi dizkio Andres Urrutia euskaltzainburuak lehendakariari: Joanes Leizarragaren *Iesus Christ Gure Iaunaren Testamentu Berria* (1571), Axularren *Gero* (bigarren edizioa, 1700?), Anton Abadiak *Lore Jokoetan bildutako euskal kantak* eta Koldo Mitxelenak 1968an Arantzazuko bilkurari buruzko akta (eskuz idatzitakoa).

Ondoren, lehendakariak eta euskaltzainburuak agerraldia egin dute hedabideen aurrean. Iñigo Urkulluk zein Andres Urrutiak, bi-biek, azpimarratu dute erakundeen arteko elkarlana ezinbestekoa dela euskalgintzari hauspoa eta sendotasuna emateko.

Azkenik, Andres Urrutiak Euskaltzaindiaren domina eman dio Urkulluri eta *Gero* liburuaren faksimilea oparitu dio. Dominak haxe dio: «Iñigo Urkullu Lehendakariari Akademiaren alde egindakoengatik esker-erakutsiz».

Elena Martinez de Madina euskaltzain urgazleak jasoko du Urrezko Zeledon Saria

2023ko Urrezko Zeledon Saria eman diote Elena Martinez de Madina ikerlari eta euskaltzain urgazleari. Besteak beste, Euskaltzaindiaren *Gasteizko Toponimia* egitasmoaren arduraduna da Martinez de Madina.

Hain zuzen, Martinez de Madinak Gasteizko toponimia eta Euskal Herrikoa berreskuratzeko egindako lana saritu nahi izan dute. Saria ofizialki irailaren 10ean eman diote.

Baiona Hiriko Urrezko Domina emango diote Xarles Videgain euskaltzain emerituari

Abenduaren 3an eman diote medaila, Euskararen Nazioarteko Egunaren kariatara, Herriko Etxearen Saloi Handian egin den ekitaldian.

Xarles Videgain Baionan (Lapurdi) jaio zen, 1947ko ekainaren 30ean. Letretan doktorea da, eta Euskal Hizkuntza eta Literaturako irakasle emeritu Paueko eta Aturrialdeko Unibertsitatean.

Euskaltzain urgazle izendatua 1983ko martxoaren 25ean eta oso 2009ko martxoaren 26an. Euskaltzain emeritua da 2022ko uztailaren 22tik. *Baionan* izeneko sarrera-hitzaldia irakurri zuen 2010eko urriaren 30ean, bere jaioterrian bertan.